

KAJIAN KES USUL FIQH
TAJUK: "RAMADHAN DATANG LAGI"

01 RAMADHAN 2012

"Bang.... Kau bangun sekarang!!! Matahari dah terpacak kat luar ni, kau masih berkubang dalam bilik tu dengan bini kau!!! Dah macam belangkas aku tengok!!! Kau ni memanglah bang... Sebelum kau kahwin sampai kau dah kahwin tak pernah nak berubah!!! Kau ni dengan tak bersahurnya. Kau tahu tak pahala bersahur tu... pung... pang... pung... pang..."

Suara bebelan ibuku dari dapur rumah memecahkan lagi suasana kampung di pagi yang hening sedang aku sibuk di belakang rumah membasuh kesemua kawah-kawah Kenduri Doa Selamat malam tadi. Demi mendapatkan tarikh yang cantik 20.12.2012, abangku rela diijab-qabulkan pada awal Ramadhan malam tadi. Pernah juga aku bergaduh dengannya semata-mata nak mencapai hasratnya itu untuk diadakan kenduri pada malam Ramadhan, tapi apakan daya aku hanyalah seorang adik bongsu yang terpaksa patuh pada arahnya. Keluarga pun apatah lagi, jika dibangkang makin menjadi-jadi pula perangainya. Tak sempat ibuku menyambung bebelannya, aku cepat-cepat bergegas naik ke atas dan terus ke bilik pasangan pengantin itu untuk kejutkan mereka sebelum ibuku mengamuk seperti singa kelaparan. *Tuk...Tuk...Tuk...* Pintunya ku ketuk berulang-ulang kali. *"Bang... Akak... Bangun... Mak dah bising tu... Bangun cepat..."* Sahut abangku dari dalam bilik... *"Ya.. Ya.. Aku bangun dah ni..."* Aku lantas turun ke belakang semula mencapai berus dawai menyelesaikan kawah-kawah yang belum sempurna disental. *"Dik... kau puasa tak harini?"* Terkejut aku disapa abangku dari belakang. Entah bila pula dia datang mengekori aku pun tak ku tahu. *"Mestilah puasa bang... Kenapa bang?" "Aku terlajak sampai hampir Subuhlah dik dengan kakak kau malam tadi, itu sebab aku tak sempat nak bersahur... Lepas Subuh aku baru mandi dik..."* Cepat-cepat aku memotong kata-katanya, *"Itulah kau bang....."*

"Man... Man... Man..." Sayup jeritan dari depan rumah memanggil namaku semakin kuat hingga ke belakang rumah. Pak Kodi datang bergegas mendapatkan aku dan abangku. *"Cepat Man... Cepat Zam... Rumah budak si Ucop tu terbakar!!! Cepat tolong aku!!!"* Tak sempat aku menyambung ceramah untuk abangku, berus dawai di tangan aku lemparkan dan terus berlari dengan Pak Kodi ke rumah Ucop. *"Bang... Kau telefon bomba sekarang bang!!!"* Sambil-sambil aku menoleh ke belakang meninggalkan abangku bersendirian di situ. Ucop adalah anak tunggal belasan tahun yang baru sahaja kehilangan kedua ibu bapanya awal Ramadhan lepas akibat kemalangan jalan raya. Puas kami penduduk kampung memujuk anak yatim piatu itu tinggal bersama kami dek memikirkan yang dia memang tiada saudara mara terdekat, tapi dia tetap menolak kerana tidak mahu menyusahkan orang katanya. *"Bang Man... Pak Kodi... ada orang bakar rumah ucop!!! ada orang khianat ucop!!!"* Suara Ucop meraung menangis dari belakang menyahut berlari mendapatkan aku dan Pak Kodi. Aku dan Pak Kodi berlari mendapatkan Ucop kerana dialah yang kami risaukan takut-takut terperangkap dalam jilatan api, *"Dah Cop!!! Yang penting kau selamat!!!"* balas Pak Kodi. Siren truck bomba dari jauh ku dengar membawa misi penyelamat.....

"Allahu Akbar Allahu Akbar.... Lailaha illa allah..." Azan Asar sayup kedengaran di masjid berdekatan rumahku membuatkan aku terjaga dari tidur tatkala pulang dari rumah ucop pagi tadi. Aku terus ke ruang tamu kejutkan Ucop yang turut terlena kepenatan menguruskan

KAJIAN KES USUL FIQH
TAJUK: "RAMADHAN DATANG LAGI"

rumahnya tadi. Kali ini dia memang betul-betul tiada tempat berteduh lagi, sebab itu aku berjaya juga akhirnya membawanya pulang tinggal bersama kami. *"Ucop... Bangun Cop... Dah Asar ni....."*

Seusai solat Asar aku membawanya ke bazar Ramadhan berhampiran membeli juadah tambahan sebagai iftar hari pertama kami sekeluarga. *"Ucop... Kau nak makan apa Ucop?... Kau bagitahu ja abang, abang belanja kau..."* Ucop hanya tunduk mendiamkan diri dan aku tahu dia masih memikirkan apa yang telah terjadi ke atas dirinya pagi tadi. Tanpa ulang bertanya, aku terus ke gerai menjual Sotong Bakar Percik dan aku tahu itulah kegemarannya walaupun kebanyakan ahli keluargaku tidak boleh makan makanan-makanan laut ini kerana kami sekeluarga memang ada penyakit alahan keturunan yang teruk dengan makanan laut. Tapi memikirkan anak yatim piatu itu, tidak salah aku melayannya lagi-lagi sedang dia dalam musibah yang besar diuji tuhan.....

"Allhumma Lakasumna Wa Bika Amanna....." Doa aku baca seperti biasa saban tahun setiap kali sebelum iftar. Semua senyap menyantap juadah berbuka di hari pertama puasa kecuali Ucop. Aku mengerti perasaannya menanggung derita musibah itu, tapi aku tak mahu dia terlampau melayan perasaannya hingga boleh merosakkan ibadah puasanya pada hari itu. Aku lantas mencapai pinggan yang terhidang Sotong Bakar Percik untuk dihulurkan kepada Ucop. Tak sempat pinggan dicapai, cepat abangku gatah dahulu separuh daging sotong tersebut. *"Bang!!! Kau mana boleh makan seafood bang... Kau tu kan ada alahan!!! Ish!!!"* Aku tidaklah marah dia ambil sedikit daging sotong yang ku belikan untuk Ucop tadi kerana aku tahu sotong yang aku beli itu banyak dan tidak akan habis juga dimakan Ucop, tapi mengenangkan penyakit alahan abang aku itu sahaja. Antara ahli keluarga kami, yang paling teruk alahan gatal-gatal akibat seafood ini adalah abang aku lah. Pernah sekali dia dimasukkan wad hampir 3 bulan dek kerana seafood sahaja sebelum ini. *"Alaaaaa... Kau ni bisinglah dik!!! Aku alah dengan udang sahaja!!! Sotong tak pa!!!"* abangku berseloroh. Aku lantakkan sahaja dan terus mencapai baki sotong tadi untuk dihulurkan kepada Ucop.....

SOALAN:

1. Keluarkan **TIGA (3)** hukum yang dapat dikenalpasti daripada kajian kes di atas.
2. Berikan **SATU (1)** dalil di setiap hukum bagi menyokong jawapan anda di soalan **SATU (1)**.
3. Daripada jawapan yang telah anda berikan di soalan **SATU (1)**, keluarkan kaedah Istinbat yang telah digunakan oleh ulama Usul Fiqh di setiap hukum yang dikeluarkan daripada kajian kes di atas.
4. Terangkan justifikasi pendalilan yang telah anda pilih bagi menyokong pengeluaran hukum daripada jawapan yang telah anda berikan di soalan **DUA (2)**.
5. Senaraikan **TIGA (3)** masalah yang dapat dikenalpasti daripada kajian kes di atas dan datangkan **SATU (1)** cadangan penyelesaian di setiap satunya dengan menggunakan pengaplikasian Usul Fiqh yang telah anda pelajari di dalam kelas.